



Otro siman arkitectonan ta cuminsa cu diseño di mapa nobo pa hospital

PA aña 2015 dos proyecto grandi di e plan integral BoAruba di Gabinete Mike Eman mester ta cla. Un di nan ta renobacion y ampliacion di dr. Horacio Oduber Hospital.

Despues di basta estudio y planeamento di kico lo ta miho pa Aruba, pero tambe diferente cambio di ley y traspaso cu mester a tuma luga, e ordo a bay pa un compania di arkitekto realisa e diseño segun e deseo di Gobierno. Pa luna di augustus lo mester t'asina leu cu e proyecto por bay destaho publico, segun Junior Tromp, un di e miembronan di Infra-Team encarga cu supervision di tur e proyectonan. Gobierno a deshaci di e plan pa construi dos toren adicional, riba consejo di expertonan cu a haci un estudio di e area en cuestion.

A pone e prome paso na luna di juni 2011, ora cu a firma e MOU, sigui pa e preparacion di e rekisitonan pa yega na un contract cu e arkitectonan. Pero den e periodo ey tambe mester

a traha riba leynan y adaptacion di leynan existente cu mester a pasa Parlamento mas lihe posibel. SOGA (Stichting Onroerend Goed Aruba), cu ta e fundacion encarga cu maneho di edificio nan di Gobierno, a busca un experto pa asesora nan den e procedura aki. E trayecto ey ta tras di lomba awor.

E siguiente fase ta unda cu SOGA ta bay firma otro siman cu e compania di arkitekto cu a haya e trabou pa pinta e mapanan. Segun Junior Tromp, nan ta spera cu tur e mapanan concerni ta cla pa bay destaho publico na luna di juli y cuminsa construcion un luna despues.

E plan inicial di Gobierno tabata pa dr. Horacio Oduber Hospital consisti di tres toren, e bieu y dos nobo. Sinembargo riba consejo di expertonan, a adapta e plan aki cu lo nifica cu e suma cu ta bay inverti a bira hopi menos. Infra-Team a yega na un arego cu SOGA, cu ta financia e

proyecto, cu e prome parti cu ta wordo ehecuta ta construcion di e toren nobo, cu ta mas o menos 10 mil meter cuadra y ta 60% di e espacio cu tin awor. E ta un edificio di seis piso y e parti mas abou ta un sala di emergencia completamente nobo y moderno. E otro areanan cu ta bay wordo muda pa e toren nobo ta "verlos- & kraamafdeling"; seccion di mucha dividi den areanan segun edad. Henter e toren nobo aki ta crea 90 camber nobo, trinta camber reparti riba tres piso. E cambenan ta di un of dos persona, cu ta duna e pashent mas espacio. Y for di un central, e verpleegsternan por monitor tur e cambenan. E sistema actual ta ideal pa e particion di e servicio cu ta wordo brinda den cada seccion.

"Henter construcion di e area nobo ta tuma un aña y mey di trabou. Inmediatamente despues ta cuminsa cu renobacion di e toren existente," Tromp a splica. Pa por realisa e trabou, sin causa

molester na e pashentnan, ta dividi e trabou den dos parti: prome e banda pariba y na final e banda pabou. No ta bay tin des-ordo cu ta stroba e pashentnan, kendenan tur ta wordo muda pa e otro banda di e construcion. Pa 2015 e parti di renobacion mester ta cla.

Un aspecto importante cu a palabra den tur e acuerdonan ta cu e mantencion ta bay completamente pa cuenta di SOGA. E plan original pa bin cu tres edificio banda pabou, a wordo cambia pa un edificio nobo riba e parkeerplaats banda di e sala di emergencia. Segun Tromp a splica, e area riba cual kier a construi inicialmente hopi biaha ta keda hopi tempo bou di awa. "Awor en bes di tres fundeshi grandi, ta bini cu uno so; en bes di tres dak, ta bay tin un solo dak... cu e mesun superficie. E gastonan pa eleva e tereno problematico tabata un inversion grandi, pa cual a scoge otro ubicacion." E problema di awa

cu hospital sa confronta cune, ta wordo atendi den e mapanan. E awa mester haya su caminda di core mas lihe posibel. Tambe ta inclui den e plannan, un area pa stacionamento cu awor caba ta un problema. A haci un calculo di kico ta e espacio necesario pa trahado- y bishitantenan di hospital. Den e plan pa ampliacion y renobacion di dr. Horacio Oduber Hospital, a tene cuenta tambe cu si den futuro mester bay tin cierto areanan cu mester wordo amplia.

Segun Junior Tromp, pa mas cu 10 aña a bin ta papiando riba kico ta bay haci cu e hospital y tur loke tabata e exigencianan a wordo hinca den e plan. Na momento cu a adapta e plan inicial, a tene cuenta cu tur e exigencianan y por bisa cu e cambionan ta minimal, cu excepcion den e cantidad di torennan. E miembro di Infra-Team a enfatisa cu tur e stakeholdernan ta involvi den e plan di expansion y renobacion di dr. Horacio Oduber Hospital.